



SEBAHAGIAN Jalan Perak di Pulau Pinang digenangi banjir kilat setelah hujan lebat sejak awal pagi semalam. - BERNAMA

Hujan lebat 4 jam tenggelamkan empat jalan P. Pinang banjir

Oleh **MALINDA ABDUL MALIK**
utusanpenang@utusan.com.my

PULAU PINANG 6 April - Setiap kali hujan lebat, penduduk di beberapa lokasi di negeri ini khususnya di kawasan bandar terpaksa berdepan dengan masalah banjir.

Malah masalah tersebut turut mengakibatkan pengguna jalan raya terkandas berjam-jam di dalam kenderaan masing-masing akibat kesesakan.

Hari ini sekali lagi warga Pulau Mutiara terpaksa berdepan keadaan sedemikian apabila hujan lebat tanpa henti lebih empat jam sejak pukul 3 pagi menyebabkan beberapa kawasan dinaiki air seperti Jalan P. Ramlee, Air Itam, Jalan Datuk Keramat dan Jalan Perak.

Seorang penunggang motosikal, **Ahmed Najib Mydin**, 36, berkata, dia terpaksa menolak kenderaan miliknya sambil meredah air kerana enjin gagal berfungsi.

"Pulau Pinang memang selamat dan cantik untuk dikunjungi tetapi jangan sangka di sebalik keunikan itu, mereka perlu berdepan banjir kilat setiap kali hujan lebat berikutan kelemahan sistem perparitan.

"Kerajaan DAP Pulau Pinang perlu memainkan peranan dalam hal ini. Sudah lima tahun mereka memerintah, perkara seperti ini pun tidak boleh diselesaikan," katanya di sini.

Seorang penduduk, **Khatijah Ibrahim**, 37, memberitahu, dia sekeluarga sudah banyak kali membuat aduan kepada kerajaan negeri namun masalah tersebut masih tiada penyelesaian.

"Setiap kali hujan lebat, banjir berlaku sehingga saya tidak boleh pergi kerja dan terpaksa bersihkan rumah sehari-hari.

"Tidak cukup dengan itu, saya terpaksa habiskan duit untuk membeli kelengkapan rumah yang banyak rosak," ujunya.

Sementara itu, Pegawai Bencana dan Operasi Jabatan Pertahanan Awam Malaysia (JPAM) Daerah Timur Laut, Maxwell

Panchai berkata, ratusan kenderaan terperangkap selain lebih 300 keluarga terjejas berikutan air naik sehingga 1.76 meter.

Selain itu tambah beliau, terdapat tebing runtuh akibat hujan lebat di Paya Terubong.

"Setakat ini tiada arahan berpindah dikeluarkan dan hujan diramal berterusan sehingga esok dan air dijangka naik sehingga 2.29 meter petang ini.

"Seramai 30 anggota bersama dua buah lori beserta sebuah bot ditempatkan di laluan yang ditenggelami air bagi membantu orang ramai keluar ke jalan utama," katanya.

